

**Kinguaassiutitigut peqquserlunnikut sakkortunerusumik  
pineqaatissinneqarsinnaalernissaat pillugu Naalakkersuisut Naalagaaffimmi  
oqartussaasunut saaffiginnissuteqarnissaat pillugu Inatsisartut aalajangiiffigisassaattut  
siunnersuut**

**pillugu**

**Inatsisinut Ataatsimiititaliap**

**siunnersuuttip aappassaaneerneqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Harald Bianco, Inuit Ataqtigiit, siulittaasoq  
Inatsisartunut ilaasortaq Anders Olsen, Siumut, siulittaasup tullia  
Inatsisartunut ilaasortaq Charlotte Pike, Inuit Ataqtigiit  
Inatsisartunut ilaasortaq Knud Mathiassen, Inuit Ataqtigiit  
Inatsisartunut ilaasortaq Mala Høy Kúko, Siumut

Ulloq 10. november 2021-mi siullermeerinninnerup kingorna ataatsimiititaliap siunnersuut misissorpaa.

**Siunnersuuttip imarisaa siunertaalu**

Kinguaassiutitigut kannguttaatsuliornerit pillugit suliassani Kalaallit Nunaanni unnerluussisussaataasut sakkortunerusumik pineqaatissiisinaanissaat anguniarlugu Naalagaaffimmi oqartussaasunut saaffiginninnissamut Naalakkersuisut siunnersuutikkut peqquneqassapput.

Pineqaatissinneqartup eqqartuussut naammassereerlugu pinerloqqinnginnissaa aammalu ingerlaqqinnissaminut kingornalu inuiaqtigiit akornanniileqqinnissaminut ikiorneqarnissaa siunertaavoq.

Kinguaassiutitigut kannguttaatsuliorfigineqarsimasut siunnersuutikkut toqqissisimanerulersinneqassasut siunnersuuteqartup oqaatigaa, taakkumi kannguttaatsuliortut

inuiaqatigiinni sivisunerusumik naapittussaaajunnaassammatigit. Aammattaaq kangguttaatsuliortup katsorsartinnissaminut piffissaqarluarnerusinnaanerani inissiisarfimmiinnerup sivitsorneqarnerata kinguneqarsinnaalernissaa siunnersuuteqartup oqaatigaa.

### **Naalackersuisut akissuteqaataat allannguutissatullu siunnersuutaat**

UKA2021/157, ilaatigut 18-it inorlugit ukiulimmik pinngitsaaliilluni atoqateqarnertut pineqaatissiissutit ullumimut sanilliullugu 50 pct.-imik sivitsorneqarnerannik nassataqartoq, taamaalillunilu aamma kinguaassiutitigit kangguttaatsuliornermik suliassani pineqaatissiissutit sukaterneqarnerannik aamma nassataqartoq, Naalackersuisut akissuteqaamminni innersuussutigaa. Aammattaaq UKA2021/157 kinguaassiutitigit pinerluuteqarsimasunut Nuummi inissiisarfimmi katsorsaavimmik pilersitsisoqarnerani nassataqassasoq Naalackersuisut innersuussutigaa.

Tamanna tunngavigalugu allannguutissatut siunnersuut una Naalackersuisunit saqqummiunneqarpoq:

**”Eqqartuuseriaatsimi pingaarnertut tunngaviit pillugit, matumani pineqaatissiisarnert annertussusaat sivisussusaallu ilanngullugit, inuiaqatigiinni kiisalu kattuffiit attuumassuteqartut peqatigalugit nuna tamakkerlugu oqallisiginninnissamut Naalackersuisut piareersaanissaannik peqqunneqarnissaat pillugu Inatsisartut aalajangiiffigisassaattut siunnersuut.”**

### **Ataatsimiititaliap siunnersuummik allannguutissatullu siunnersuummik suliarinninnera**

#### UKA2021/157 pillugu:

Aalajangiiffigisassatut siunnersuutit matuma saniatigut 2021-mi ukiaanerani ataatsimiinnermi Naalackersuisut siunnersuutaat una aamma suliarineqarpoq: UKA2021/157. Immikkoortoq Kalaallit Nunaanni pinerluttulerinnermi inatsimmi aamma Kalaallit Nunaanni eqqartuusisarnermik inatsimmi allannguutit arlalinnut tunngavoq, ilaatigut inunnut 18-it inorlugit ukiulinnut pinngitsaaliilluni atoqateqarneq allatullunniit kinguaassiutitigit atoqatiginninnerit sakkortunermik pineqaatissiissutaasalernissaannut. Allannguutit kinguneraa pineqaatissiisarnertup 50 pct.-imik qaffanneqarnissaa.

18-it inorlugit ukiulinnik pinngitsaaliinerit il.il. eqqarsaatigalugit aalajangiiffigisassatut siunnersuut taamaalilluni akuerineqareerpoq, siunnersuuteqartup sillimaffigisinnaasimannngisaanik, siunnersuutimmi taakku marluk ataatsikkut saqqummiunneqarmata.

Suliani taamaattuni pineqaatissiisarneq taamaalilluni sivitsorneqareersoq tassunga atatillugu ataatsimiititaliamit oqaatigineqassaaq aammalu maannakkut sivitsueqqinnissaq siunertamut naapertuuttutut isigineqarsinnaanani.

Aalajangiiffigisassatut siunnersuut una inunnut 18-it inorlugit ukiulinnut pinngitsaaliilluni atoqateqarnernut allatulluunniit kinguaassiutitigut atoqatiginninnernut pineqaatissiinernut taamaallaat tunnganngilaq. Aalajangiiffigisassatut siunnersuutip suliat kinguaassiutitigut kannguttaatsuliornernut tunngasut tamaasa imarai.

Tamatuma pingaarnertut nassatarissavaa inunnut 18-ileereersimasunut kinguaassiutitigut pinerlunnernut pineqaatissiinerit aamma sivitsorneqarnissaat. Inunnut 18-it inorlugit ukiulinnut tunngatillugu siunnersuutip ilaatigut nassatarissavaa 12-ileereersunik 15-illi ataallugit ukiulinnik kajumissuseqaqatigiinnikkut atoqateqarnermut pineqaatissiinerit aamma sivitsorneqarnerat.

Paasissutissanik suliani taamaattuni pineqaatissiissutaasartut annertussusaannik paasinarsisitsisunik aalajangiiffigisassatut siunnersuummut tunngavilersuutini siunnersuuteqartoq saqqummiussinngilaq.

#### Maanna pineqaatissiisarnerup annertussusaa:

Assersuutit tulliuuttut maanna pineqaatissiisarnerup annertussusaanut erseqqissaataasinnaapput:

Assersuut 1 (Aatsaat naapitamik nakuuserluni atoqateqarneq): Unnukkut kingusissukkut angut 38-nik ukiulik imerniartarfimminngaanniit angerlalerternermini arnamik 35-nik ukiulimmik bussinut utaqqisarfirmiittumik takusaqarpoq. Arnaq kisimiippoq. Angutip arnaq nakuusernissamik siorasaarlugu pinngitsaalillugu atoqatigaa.

Tamatumani aallaavigineqartussaq tassaavoq ukiumi ataatsimi affarmilu inissiisarfirmiittussanngortitsilluni pineqaatissiineq.

Assersuut 2 (Nalunngisamik pinngitsaaliilluni atoqateqarneq): Arnap 26-nik ukiullip fiisterfimmini angut ukioqatipajaani oqaloqatigerujuulerpaa. Unnuup ingerlanerani qiteqatigiillutik arnap angut eqillugulu kunippaa. Fiisterfimminniik ingerlaqatigiillutik angutip angerlarsimaffiannukaqatigiipput, nalaasaarfimmilu kunissuullutillu attuaruoorput. Angutip arnap qarlii peernalermagit arnaq uneqqusivoq nikuinniarsarilerlunilu. Angutip arnap piumannginnera soqutiginagu pinngitsaalillugu atoqatigaa. Arnaq akersuukkaluartoq angut nukittuneruvoq.

Tamatumani aallaavigineqartussaq tassaavoq ukiumi ataatsimi inissiisarfimmiittussanngortitsilluni pineqaatissiineq.

Assersuut 3 (Pinngitsuusaarluni atoqateqarneq): Arnaq 28-nik ukiulik nangikkiarpoq. Aalakuungaatsiarpoq, unnuallu ingerlanerani nalaasaarfimmi sininnialerluni. Iterpoq angutip 30-nik ukiullip atoqatigigaani. Nangikkiarnermi peqataasut angerlakaasimammata inissiami kisimiipput.

Tamatumani aallaavigineqartussaq tassaavoq qaammatini sisamaniit arfinilinnut inissiisarfimmiittussanngortitsilluni pineqaatissiineq.

Assersuut 4 (Kannguttaatsuliorneq): Angut 23-nik ukiulik piumaffigineqarani oqarasuaatiminit usumi tissaqqasup assinga suliffimmini ilinniartunngoqqammersumut 19-inik ukiulimmut nassiuppaa.

Tamatumani aallaavigineqarsinnaasoq annerpaaq tassaavoq piumasaqaasiinikkut utaqqisitamik inissiisarfimmiittussanngortitsilluni pineqaatissiineq.

Assersuut 5: (Ukiukippallaamik atoqateqarneq): Niviarsiaqqap 14-inik ukiullip nukappiaraq atuarfeqatigisani 16-inik ukiulik atoqatigiumaneraani aperaa. Niviarsiaaraq timimigut inerilluarsimasuuvoq, kisianni suli 15-it inorlugit ukioqarnera nukappiaqqap nalunngilaa. Taamaattoq atoqatigaa. Kingorna nukappiaraq peqqissimilerpoq, ullualunnguillu qaangiummata niviarsiaqqap aapparilerumammani itigartippaa. Niviarsiaqqap arni oqaluttuarfigaa, arnaatalu nukappiaraq politiinut tunniullugu.

Tamatumani aallaavigineqarsinnaasoq annerpaaq tassaavoq piumasaqaasiinikkut utaqqisitamik inissiisarfimmiittussanngortitsilluni pineqaatissiineq.

Pinerluttoq 22-nik (sinnerlugilluunniit) ukioqarsimasuuppat aallaavigineqartussaq tassaasimassagaluarpoq ulluni 30-60-ini inissiisarfimmiittussanngortitsilluni pineqaatissiineq.

Inissiisarfimmi inissaqartitsineq pillugu:

Suliani kinguaassiutitigut kannguttaatsuliornermut tunngasuni pineqaatissiisarnerup sivitsorneqarnerata kingunerisinnaavaa inissiisarfimmi inissat naammakkunnaarnerat aammalu inuup eqqartuussaarenermi kingorna inissiisarfimmiilernissaanut piffissap sivitsornera. Sanaartornermut aningaasaliissutinik pisariaqartunik pinerluttunik isumaginnittoqarfimmut aningaasaliinissap saniatigut tamatuma aamma kingunerissavaa ingerlatsinermut

missingersuutit amerlineqarnerat. Aammattaaq amerlineqarnerisa pisariaqartissavaa inissiisarfimmi sulisut pisariaqartinneqartut sulisussarsiarineqarsinnaanissaat.

Siunnersuutip kingunerisassai pillugit:

Pinerluttaalisitsiniarneq pillugu Siunnersuisoqatigiit UKA 2021/157-ip tusarniaassutigineqarnerani akissuteqaamminni eqqumaffigeqqaat pineqaatissiissutip sivilissusaata pinerluttarnernut annikitsuinnarmik killilimmillu sunniuteqartarnera, kingornalu pineqaatissinneqartup pinerloqqinnissaanut (uteqqiasumik pinerloqqittarnermut) sunniutaavallaartannginnera ilisimatusarnikkut takutinneqarmat.

Taamaammallu pineqaatissiisarnerup sakkortusinissaanik kinguaassiutitigut kannguttaatsuliornerit amerlassusaasa ikilinerannut siunnersuutip peqataaqataanissaa naatsorsuutigineqarani.

Tamannalu siunnersuummut tunngavilersuut naapertorlugu siunnersuuteqartup pingaarnertut anguniagarigunangilaa.

Pinerluttulerinermi inatsisitigut pineqaatissiissutit saniatigut pinerluttuliortumut qisuariaatit:

Pineqaatissiissuterpiap saniatigut kinguaassiutitigut kannguttaatsuliornermik suliani unioqqutitsisimasut amerlanertigut inuup ajoqusersimaneranut, pigisanik aseruisimanermut allatulluunniit unioqqutitsinerup kingunerisaanik pinerlineqartumut narrujuummisitaanermut taartisiassanik akiliisinneqartarput. Narrujuummisitaanermut taartisiassat pinerlineqartup ajoquserneqarnerminit taartisiassarai. Narrujuummisitaaneq inummut inuullu ataqqinassuseqartutut misigineranut nikanarsaanertut nassuiarneqarpoq, imaappoq inuup nammineq naleqassusaanik tusaamaneqarneranillu innarlineq, nikanarsaanerullu sakkortussusaa malillugu inissinneqartarluni. Aningaasat amerlassusaat siusinnerusumi peruserineqartumut sanilliullugu pingajorarterummik 2018-imi qaffanneqarput, qaffanneqarneranniillu maanna 10.000 – 150.000 koruunillu nalaanniilerlutik.<sup>1</sup>

<sup>1</sup> Narrujuummisitaanermut taartisitinneqarnissami aallaaviuvoq ajoqusiisumik iliuserisap immikkut nikanarsaasuunissaa. Narrujuummisitaanermut taartisiassat nalinginnaasumik periutsit malillugit kinguaassiutitigut kiffaanngissusiiaarnermut tunngasunut pinerlunnernut immikkoortinneqarput, assersuutigalugit ilaqutarisamik atoqateqarnek, pinngitsaaliilluni atoqateqarnek, kannguttaalliorfigisaaneq allallu. Periutsit nalinginnaasut malillugit suliani nakuusernermut tunngasuni narrujuummisitaanermut taartisiassarsisoqarnek ajorpoq.

Taartisiassap annertussusaa nikanarsaanerup sakkortussusaata naleqqatigissavaa, pinerluuteqariaatsinulli assigiinngitsunut tunngatillugu eqqartuussisarnermi aallaavissanik aalajangersaasoqarsimalluni. Inatsit nr. 140-kkut, 28. februaari 2018-imeersukkut danskit eqqartuussisarnermi inatsisaat pinerlineqarsimanermullu taarsiisuteqartarnermut inatsit allanngortinneqarpoq, taamaalillunilu narrujuummisitaanermut taartisiaritinneqartartut 1/3 missaannik qaffanneqarlutik. Narrujuummisitaanermut taartisiassanik aalajangersaasanermi perusiat manna tikillugu nunatsinni malittaraagut, taamaattumillu

Naalakkersuisut allannguutissatut siunnersuutaat pillugu:

Naalakkersuisut allannguutissatut siunnersuutaannut tunngatillugu ataatsimiitaliap oqaatigisariaqarjaa, tassani siunnersuutaappaartumi siunertarinqartumik allannguinninnissamik piunasaqaammik naammassinninngimmat. Matumani pineqartoq tassaavoq aalajangiiffigisassatut siunnersuutaasumut allannguutissatut siunnersuut ima allannguitigissanngimmat allaat allannguutissatut siunnersuutip akuersissutigineqarnera aalajangiiffigisassatut siunnersuutit Inatsisartuni marloriarlutik suliarineqartussaannerannik piunasaqaammik naammassinnikkunnaarluni.

Inatsisunik ataqinninnermik misissuinerup professori dr. jur. Flemming Balvigip Kalaallit Nunaanni Eqqartuussiveqarnermut Siunnersuisoqatigiit tunuliaqutaralugit 2014-imi ingerlassimasaata eqqumaffigeqquneqarnissaanut allannguutissatut siunnersuut tunngavissiivoq.

Misissuinerup ilaatigut takutippaa nunatsinni innuttaasut amerlanerussuteqarluartut isumaqartut pinerluuteqarsimasut inuiaqatigiinnut akuulerseqqinniarniqarnissaat pinerluuteqarsimanermit tunngasumik eqqartuussinerni (suli) siunertarinqartariaqartoq, tassalu eqqartuunneqarsimasup pinerloqqinnginnissamut ikiorneqarnissaa siunertaralugu

---

Taartisinissamik Aalajangiisartut Danmarkimi akinik iluarsiineq malinneqassasoq aalajangerpaat. 1. aprili 2018-ip kingorna pinerluuteqarnernut taartisiassat ima annertussuseqarput:

- a) Pinerluttulerinermi inatsimmi § 77, imm. 1, nr. 1 (pinngitsaaliilluni atoqatiginninneq) 100.000 kr.-inik taartisiassaqaartitsivoq. Immikkut sakkortussusilinni aningaasat 150.000 kr.-inut amerlineqarsinnaapput.
- b) Pinerluttulerinermi inatsimmi § 77, imm. 1, nr. 1, tak. § 12 (pinngitsaaliilluni atoqatiginneriaraluarneq) 40-50.000 kr.-inik taartisiassaqaartitsivoq. Ilaqutarisanik ukiukippallaartunik atoqateqariaraluarneq aalajangersagaq malillugu minnerpaamik 26.000 kr.-inik taartisiassaqaartitsissaaq.
- c) Meeqqanik kinguaassiutitigut ukiuni amerlasuuni immikkut sakkortussuseqartumik atornerluinerni aammalu pinerliisup meeqqallu akornanni tatiginninneq piutillugu minnerpaamik 150.000 kr.-inik taartisiassaqaartitsinissaaq aalajangersarneqarpoq.
- d) Pinerluttulerinermi inatsimmi § 77, imm. 1, nr. 2, (pinngitsuusaarluni atoqateqarneq) 40.000-it 50.000 kr.-illu akornanni taartisiassaqaartitsissasoq aalajangersarneqarpoq.
  - Kinguaassiutitigut allatut atoqatiginninnerit 30.000-40.000 kr.-inik taartisiassaqaartitsissasoq aalajangersarneqarpoq.
- e) Pinerluttulerinermi inatsimmi § 84 (kannguttaalliorneq) 5.000-15.000 kr.-inik taartisiassaqaartitsissasoq aalajangersarneqarpoq.
- f) Pinerluttulerinermi inatsimmi § 79 (kinguaassiutitigut meeqqamik 15-it inorlugit ukiulimmik atoqatiginninneq) atoqatiginninnermi 20.000-25.000 kr.-inik taartisiassaqaartitsivoq.
  - Kinguaassiutitigut allatut atoqatiginninnerit 10-15.000 kr.
  - Atuutissanngilaq: aappariittut inissisimasimagaanni taartisiassaqaartitsineq atorunnaavissinnaavoq.

Pisuni allani taartisiarititassat annertussusissaat pisuni ataasiakkaani naliliinermik tunngaveqartarpoq. Pisumi ataatsimi ajoqusiinerit arlaqarsimappata aningaasat annertussusaannik immikkoortitsiunnaarneq pisinnaavoq. (Pinerluffigineqarsimasut taartisinissaannik Aalajangiisartut iliuunniusiaanniit tigusaq)

suliniuteqarnissaq.

Kinguaassiutitigut kannguttaatsuliorsimasut sakkortunerusumik pineqaatissinneqarsinnaalernissaat pillugu siunnersuummut tunngatillugu immikkut soqutiginartoq tassaavoq eqimattamik aalajangersimasumik apersuinikkut misissuineq, inatsisinik ataqinninnermik misissuinnermut ilaasoq. Kalaallit Nunaanni 18-iniit 74-inut ukiullit tigulaariffigineqarlutik eqimattanut 18-inut immikkoortinneqarput, taakkulu suliat aalajangersimasut marluk, aappaa aapparissamut nakuusernermut tunngasoq aappaalu nalunngisamik pinngitsaaliilluni atoqateqarnermut tunngasoq, qanoq eqqartuussutigineqassanersut isummerfigisussanngorlugit. Tamatumunnga atugassatut filmit marluk eqqartuussinernik takutitsisut suliarineqarsimapput. Isiginnaartitsisartut unnerluussaasuusaartutillu ilisimannittuusuusaarput eqqartuussisuusorli, illersuisuusoq unnerluussisuusorlu ilumoortumik taamak atuuffeqarput. Filmiliani kalaallisut oqaatsit atornerarput, qallunaatulli allagartalerneqarlutik.

Eqimattat ima katitigaapput peqataasunit amerlanerussuteqartut (quliusuni arfineq-marluk missaat) nalinginnaasumik isumaqarlutik nunatsinni pineqaatissiisarneq sakkukippallaartoq. Taamaattorli suliami pinngitsaaliilluni atoqateqarnermut tunngasumi paasinarsivoq inunnit pingasuusunit marluk (67%) eqqartuussisarnermi periusiusumit *sakkukinnermik* pineqaatissiiumassagaluartut. (Aamma suliami nakuusernermut tunngasumi peqataasut amerlanerit eqqartuussisarnermi periusiusumit sakkukinnermik pineqaatissiiumassagaluartut).

Marloqiusamik isumaqartoqarnera misissuinerup takutippaa: Innuttaasut amerlanerussuteqartut isumaqartut Kalaallit Nunaanni pineqaatissiisarneq sakkukippallaartoq – kisiannili piviusumi pineqaatissiisarneq innuttaasut ilimagisaanniit sakkortunerusoq, sulianilu aalajangersimasuni amerlanerit eqqartuussisarnermi periusiusumit sakkukinnerusumik pineqaatissiissagaluartut.

### **Ataatsimiititaliap inassuteqaatai**

Ataatsimiititaliaq siunnersuummut siunnersuuteqartullu siunertaanut matumunnga paasinnilluarpoq. Meeqqanut kinguaassiutitigut kannguttaatsuliornernut tunngatillugu, ataatsimiititaliaq siunnersuuteqartup kissaataanik tapersiisimavoq, UKA2021-mi siunnersuutip allap peqatigitilluguli Naalackersuisunit saqqummiunneqartup akuersissutigineqarnissaata inassutigineratigut. Siunnersuutip aappaa meeqqat 18-it inorlugit ukiullit kinguaassiutitigut kannguttaatsuliorffigineqarnerannut pineqaatissiissutaasartup 50%-imik sivitsorneqarnissaanik imaqarpoq.

Apeqqut ataatsimiititaliap matumani isummerfigisassaa tassaasimavoq, pineqaatissiisarneq suliani taakkunaniinnaanngitsoq kisiannili kinguaassiutitigut kanngunarsaaneq pillugu suliani tamani (inersimasunut kanngunarsaanerit ilanngullugit) sivitsorneqassanersoq.

Pineqaatissiisarnerup sakkortussusianik apeqqut qulequtaavoq misigissutsinik sakkortuunik saqqummersitsisinnaasoq. Inuppassuit – amerlavallaat – namminneerlutik kinguaassiutitigut kannguttaatsuliorfigineqarsimapput, amerlasoorpassuillu taamatut kannguttaatsuliorfigineqarsimanermikkut tarnikkut suli artorsaateqarlutik.

Pinerluuteqartut sakkukippallaamik pineqaatissinneqartarnersut apeqqutigigaanni amerlasoorpassuit angissagunarput – taamaassallutillu pineqaatissiinerup sakkortussusia apeqqutaatinnagu. Pinerlineqartummi anniaataanut pineqaatissiineq qanoq ittoq naleqquppa?

Danmarkimi ukiut ingerlanerini partiit naalakkersuisullu pineqaatissiinerit sakkortusineqarnissaannik suliaqarnissamat pilerngutiinnarsimapput. Pineqaatissiisarnermullu sakkortusinerit tamakkua pinerluuteqarnerup pineqartup annikillisinneqarnissaanut peqataasimangillat. Akerlianik tamakku pinerluuteqarsimasunik isumaginnittoqarfimmut taamalu inuiaqatigiinnut akisoorujussuusimapput. Aningaasat immaqa pinaveersaartitsinermut pinerluuteqarnermiillu eqqugaasut ikiorneqarnerannut pitsaanerumik atornerqarsinnaasimagaluarlutik. Nunatta aamma tassunga ingerlanissaa kissaatigaarput?

Tamatumunnga ilaatigut apeqqutaavoq, suna pineqaatissiinerup siunertaatut isigineripput. Pineqaatissiinerit inuiaqatigiinnit akiniaanertut isigivagut? Imaluunniit pineqaatissiinerit innuttaasut pinerlunnissamat ersisaarutitut (periuseq immi iluaqutaavallaanngitsoq) isigivagut? USA-mi assersuutigalugu ukiuni 99-ini paarnaarussassanngortitsilluni pineqaatissiisoqarsinnaavoq. Pinerlunnissap pinaveersaarneqarnissaanut ukiuni 99-ini paarnaarussassanngortitsineq inuiaqatigiinnut pisariaqarnerluni? Aamma ukiuni 99-ini paarnaarussassanngortitsilluni pillaaneq, assersuutigalugu qaammatini 18-ini pillagaanermit, ersinarnerulluniluunniit pinaveersaartitsinerunera?

Nunatsinni pineqaatissiinerit inuiaqatigiinni nalinginnaasumik inooqataaqqilernissamat siunertaqarnissaat qangali pingaartitarisimavarput – tassa pineqaatissinneqarsimasut innuttaalluartutut inatsisinillu malinnittutut innuttaaqataaqqilernissaannut ikiorneqarnissaat siunertaralugu *taamalu* inuiaqatigiit illersorniarlugit. Pineqaatissinneqarsimasunik isumaginnittoqarfiulli inuiaqatigiinnut akuulersitseqqinniarluni ukiorpassuarni suliniarnera killeqarsimavoq minnerunngitsumillu katsorsarneqarnissamat neqeroorutit naammangilluinnarsimallutik. Tamanna iliuuseqarfialugu aallartissimavarput, naammattumillu iliuuseqarsimavugut?




Misissuisimanagerup takutippaa, nunatsinni innuttaasut akornanni pineqaatisseeriaatsip inuiaqatigiinnut akuulersitseqqinnissamik siunertaata attatiinnarneqarnissaa suli amerlanerussuteqarluartunit tapersorsorneqartoq.

Ataatsimiititaliap maluginiarpaattaaq, nalinginnaasumik sakkortunerusumik pineqaatissiisalernissamik kissaatini, siunnersuuteqartup taamaaliornikkut pineqaatissinneqarsimasut amerlanerusut katsorsaalluni suliniutinik ingerlatsisinnaalertussaanerannik ilaatigut tunngavilersoraa. Tamannali ajornartorsiut sukumiinerusumik qulaajarneqartariaqartuuvoq.


Peqatigitillugu aamma isiginngitsuusaarneqartariaqanngilaq kinguaassiutitigut kanngunarsaanerit pillugit suliani tamani pineqaatissiisarnerup nalinginnaasumik sakkortusineqarnera siammasissorujussuarmik eqquisussaammat, taamalu taamatut sakkortunerulersitsineq aatsaat naapitamik nakuuserluni atoqateqarnernuinnaanngitsoq kisiannili aamma assersuutigalugu kannguttaatsuliornernut sakkortunngitsunut atatillugu sunniuteqartussaalluni.

Taamatut oqaaseqarluni ataatsimiititaliap isumaqatigiittup siunnersuutip allannguutissatullu siunnersuutip itigartinneqarnissaat inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.




Harald Bianco  
Siulittaasoq




Anders Olsen  
Siulittaasup tullia



Charlotte Pike



Knud Mathiassen



Mala Høy Kúko